

经籍典

文學典第一百四十三卷

制誥部紀事

尚書仲虺之誥成湯放桀于南巢惟有慙德曰予恐來世以台爲口實仲虺乃作誥注以諸侯相天

子會同曰誥 湯誥王歸自克夏至於亳誕告萬方王曰嗟爾萬方有衆明聽予一人誥 大

誥序武王崩三監及淮夷叛周公相成王將黜殷作大誥 康誥序成王既伐管叔蔡叔以殷餘

民封康叔作康誥 酒誥傳康叔監殷民殷民化紂嗜酒故以戒酒誥 召誥序成王在豐欲

宅洛邑使召公先相宅作召誥 洛誥序召公既相宅周公往營成周使來告卜作洛誥 康

王之誥序康王既尸天子遂誥諸侯作康王之誥

漢書武帝本紀元狩六年夏四月乙巳廟立皇子閔爲齊王旦爲燕王胥爲廣陵王初作誥注服虔

曰誥勅王如尚書諸誥也

周書文帝本紀魏恭帝元年夏四月帝大饗羣臣魏史柳虬執簡書於朝曰廢帝文皇帝之嗣子年七歲文皇帝託於安定公曰是子才由於公不才亦由於公宜勉之公既受茲重寄居元輔之任又

納女爲皇后遂不能訓誨有成致令廢黜貢文皇帝付屬之意此咎非安定公而誰太祖乃令太常
盧辯作誥諭公卿曰嗚呼我羣后暨衆士維文皇帝以襁褓之嗣託於予訓之誨之庶厥有成而予
罔能革變厥心庸暨乎廢墜我文皇帝之志嗚呼茲咎予其焉避予實知之矧爾衆人之心哉惟予
之顏豈惟今厚將恐來世以予爲口實

蘇綽傳自有晉之季文章競爲浮華遂成風俗太祖欲革其弊因魏帝祭廟羣臣畢至乃命綽爲大
誥奏行之自是之後文筆皆依此體

唐書溫彥博傳彥博善辭令每問四方風俗臚布誥命若成誦然

岑文本傳文本擢中書舍人時顏師古爲侍郎自武德以來詔誥或大事皆所草定及得文本號善
職而敏速過之或策令叢遽敕吏六七人泚筆待分口占授成無遺意師古以譴罷溫彥博爲請曰
師古練時事長於文誥人少逮者幸得復用帝曰朕自舉一人公毋憂乃授文本侍郎專典機要封
江陵縣子

張說傳朝廷大述作多出其手帝好文辭有所爲必令視草

蘇頲傳頲加知制誥給政事食給食自頲始時李父對掌書命帝曰前世李嶠蘇味道文擅當時號蘇李今朕得頲及父何愧前人哉

李父傳父知制誥與宋璟等同典選事請謁不行時人語曰李下無蹊徑改黃門侍郎封中山郡公制敕不便輒駁正

賈曾傳開元初復拜中書舍人曾固辭議者謂中書乃曹司非官稱嫌名在禮不諱乃就職與蘇晉同掌制誥皆以文辭稱時號蘇賈子至字幼鄰擢明經第解褐單父尉從元宗幸蜀拜起居舍人知制誥帝傳位至當撰冊既進稿帝曰昔先天誥命乃父爲之辭今茲命冊又爾爲之兩朝盛典出卿家父子手可謂繼美矣至頓首嗚咽流涕

許景先傳景先與齊澣王丘韓休張九齡更知制誥以雅厚稱張說曰許舍人之文雖乏峻峰激流然詞旨豐美得中和之氣

孫逖傳開元間蘇頲齊澣蘇晉賈曾韓休許景先及逖典詔誥爲代言最而逖尤精密張九齡視其草欲易一字卒不能也

于邵傳邵知制誥進禮部侍郎朝有大典冊必出其手

崔元翰傳元翰拜禮部員外郎竇參秉政引知制誥其訓辭溫厚有典誥風

權德輿傳德輿遷起居舍人兼知制誥進中書舍人當是時帝親攬庶政重除拜凡命諸朝皆手制中下始德輿知制誥而徐岱給事中高郢爲舍人居數歲岱卒郢知禮部德輿獨直兩省數旬一還舍乃上書言左右掖垣承天子誥命奉行詳覆各有攸司舊制分曹十員以相防檢大抵事有所壅則吏得爲非四方聞者或以朝廷爲乏士要重之司不宜久廢帝曰非不知卿之勞但擇如卿者未得其人耳

楊炎傳炎遷中書舍人與常袞同時知制誥袞長於除書而炎善德音自開元後言制詔者稱常楊云

鄭絪傳絪遷中書舍人德宗自興元還置六軍統軍視六尚書以處功臣除制用白麻付外又廢宣威軍益左右神策以監軍爲中尉竇文場恃功陰諷宰相進擬如統軍比絪當作制奏言天子封建或用宰相以白麻署制付中書門下今以命中尉不識陛下特以寵文場耶遂著爲令也帝悟謂文

場曰武德貞觀時中人止內侍諸衛將軍同正賜緋者無幾自魚朝恩以來無復舊制朕今用爾不謂私若麻制宣告天下謂爾脅我爲之文場叩頭謝更命中書作詔并罷統軍用麻矣明日帝見綱曰宰相不能拒中人得卿言乃悟

高郢傳郢恭慎不與人交常掌制誥家無留稿或勸盍如前人傳制集者答曰王言不可藏私家陽城傳德宗欲相裴延齡城顯語曰延齡爲相吾當取白麻壞之哭於庭帝不相延齡城力也

令狐楚傳憲宗時累擢職方員外郎知制誥其爲文於牋奏制令尤善每一篇成人皆傳諷皇甫鎛以言利幸與楚蕭俛皆厚善故薦於帝帝亦自聞其名召爲翰林學士進中書舍人方伐蔡久未下議者多欲罷兵帝獨與裴度不肯赦元和十二年度以宰相領彰義節度使楚草制其辭有所不合度得其情時宰相李逢吉與楚善皆不助度故帝罷逢吉停楚學士但爲中書舍人俄出爲華州刺史後他學士比比宣事不切旨帝抵其草思楚之才

武儒衡傳儒衡論議勁正有風節且將大用宰相令狐楚忌之會以狄兼謨爲拾遺楚自草制引武后革命事盛推仁傑功以指切儒衡且沮止之儒衡泣見上曰臣祖平一當天后時避仕終老不涉

於累帝慰勉之自是薄楚爲人也

王伋傳元和中伋拜朔方靈鹽節度使吐蕃欲作烏蘭橋以過師積材河曲朔方府常遣兵發其木委於河故莫能成及伋至虜知其寡謀乃厚賂之而亟遂功築月城以守自是虜歲入爲寇朔方乘障不暇人以咎伋在鎮檢下亡術猜忌多殺人召還爲右衛將軍故事將相除徙皆內出制故號白麻至伋以責罷遂中書進制久之卒

元稹傳稹擢祠部郎中知制誥變詔書體務純厚明切盛傳一時

王涯傳涯文有雅思永貞元和間訓誥溫麗多所稿定

王仲舒傳穆宗立每言仲舒之文可思最宜爲誥有古風召爲中書舍人

崔羣傳穆宗立以吏部侍郎召之勞曰我爲太子卿力也羣曰此先帝意臣何力焉且陛下向爲淮西節度使臣起制草其言有能辨南陽之牘允符東海之貴先帝然之則傳付久矣俄拜御史大夫封敖傳敖爲翰林學士劉稹平李德裕以定策功進太尉時敖草其制曰謀皆予同言不它感德裕以能明專任己以成功謂敖曰陸生恨文不迫意如君此等語豈易得邪解所賜玉帶贈之

韓偓傳偓至鳳翔遷兵部侍郎進承旨宰相韋貽範母喪詔還位偓當草制上言貽範處喪未數月遽使視事傷孝子心今中書事一相可辦陛下誠惜貽範才俟變纒而召可也何必使出我冠廟堂入泣血柩側毀瘠則廢務勤恪則忘哀此非人情可處也學士使馬從皓逼偓求草偓曰腕可斷麻不可草從皓曰君求死耶偓曰吾職內署可默默乎明日百官至而麻不出宦侍合譟茂貞入見帝曰命宰相而學士不草麻非反邪艷然出姚洎聞曰使我當直亦繼以死旣而帝畏茂貞卒詔貽範還相洎代草麻

大唐新語張說獨排太平之黨請太子監國平定禍亂迄爲宗臣前後三秉大政掌文學之任幾三十年爲文思精老而益壯尤工大手筆善用所長引文儒之士以佐王化得僧一行贊明陰陽律曆以敬授人時封太山祠睢上舉闕禮謁五陵開集賢置學士功業恢博無以加矣尙然諾於君臣朋友之際大義甚篤及薨元宗爲之罷元會制曰弘濟艱難參其功者時傑經緯禮樂贊其道者人師式瞻而百度允釐旣往而千載貽範台衡軒鼎垂黼藻於當年徽策寵章播芳蕤於後葉故尙書左丞相燕國公說星象降靈雲龍合契元和體其冲粹妙有釋其頤至挹而莫測仰之彌高釋義探繫

表之微英詞鼓天下之動昔傳風諷綢繆歲華含春谷之聲和而必應蘊泉源之智啟而斯沃授命與國則天衢以通濟同以和則朝政惟允司鈞總六官之紀端揆爲萬邦之式方弘風緯俗返本於上古之初而邁德振仁不臻於中壽之福吁嗟不慙旣喪斯文宣室餘談洽若在耳玉殿遺草宛然留迹言念忠賢良深震悼是用當宁撫几臨樂撒懸罷稱觴之儀遵往祿之禮可贈太師賻物五百段禮有加等儒者榮之

東觀奏記勅鄉貢進士溫廷筠早隨計吏夙著雄名徒負不羈之才罕有適時之用放騷人於湘浦移賈誼於長沙尙有前席之期未爽抽毫之思可隨州隋縣尉舍人裴坦之詞也廷筠字飛卿彥博之裔孫也詞賦詩篇冠絕一時與李商隱齊名時號溫李連舉進士竟不中第至是謫爲九品吏進士紀唐夫嘆廷筠之冤贈之詩曰鳳凰詔下雖承命鸚鵡才高却累身人多諷誦上明主也而廷筠反以才廢制中自引騷人長沙之事君子譏之

世說補李甘爲侍御史鄭注求入相甘言於朝曰宰相代天理物注何人敢茲叨竊白麻若出我必壞之玉泉子崔珙爲東都留守判尙書省事中書舍人崔荆爲庶子分務謁珙珙不爲見荆乃求與

珙素善者使候問之怒不已他日因酒酣復詰之居守益忿曰誓不與此人相面且人爲文詞言語豈可以珙兄弟作假對耶荆終不諭親族咸憂慄不安甥姓中有穎悟者採取荆文集詳之乃掌制日貶崔球爲撫州郡丞云實緣鴈序鼓扇澆風荆因爾感疾

東觀奏記上每命相盡出睿有人無知者一日制詔樞密院兵部侍郎判度支蕭鄴可同中書門下平章事仰指揮學士院降麻處分樞密使王歸長馬公儒以鄴先判度支再審聖旨未審落下爲復仍舊上意貴迎闕蕭也乃宸翰付學士院戶部侍郎判戶部事崔慎由可工部尚書平章事落下判

戶部事宸斷如此

武昌軍節度使苗

名與廷裕家諱同

責同子嚴不避馬擒至幕笞其背嚴母詣闕稱

冤苗貶江州司馬制曰避馬雖乖於嚴敬鞭人合顧於簪纓舍人楊紹復之詞也苗自此爲清議所

薄

大中九年正月十九日制曰朝議郎守尚書刑部郎中桂國賜緋魚袋唐枝將仕郎守尚書

職方員外郎裴庭裕早以科名薦由臺閣聲猷素履亦有可嘉昨者吏部以爾秉心精專請委考覈而臨事或乖於公當物議遂至於沸騰豈可尙列彌綸是宜竝分符竹善綏凋瘵以補悔尤枝可虔州刺史散官勳封如故裴可申州刺史散官如故舍人杜德公之詞也

全唐詩話鄭畋字台文懿宗朝韋保衡路巖忌宰相劉瞻誣以罪黜爲荆南節度畋爲制詞云早以文學疊中殊科風稜甚高恭謹無玷又云安數畝之居仍非已有却四方之賄惟恐人知韋路大怒貶畋爲梧州刺史責劉驩州司戶命舍人李庚爲詞深文痛詆必欲加害屬懿宗厭代僖宗立蕭倣輔政舉瞻自代召歸朝廷至湖南庚典是郡出迎江次牌亭致酒瞻唱竹枝詞送庚酒命庚酬和庚曰不嫻音律瞻曰君應只解爲制詞也是夕庚飲鴆而卒

會要景福二年以李磎爲相宣制日知制誥劉崇魯抱其麻而哭之乃授磎太子少師

北夢瑣言劉崇望兄弟五人內四人皆登進士第仕至將相丞郎其元昆崇彝不及第官至省郎生五男每院各與一人爲後崇彝留一男少有才思一旦心疾惟染翰草制誥褒貶朝中卿相咸撫其實骨肉間懼聞于外旋取燼之宛爲掌誥之美竟廢于時 亂離以來官爵過濫封王作輔狗尾

續貂天成初桂州節度觀察使馬爾卽湖南馬殷之弟本無功德品秩已高制詞云爾名尊四輔位冠三師旣非品秩升遷難以井田增益此要語也議者以名器假人至此賈誼所以長歎息也

五代史劉岳傳岳唐明宗時爲吏部侍郎故事吏部文武官告身皆輸朱膠紙軸錢然後給其品高

者則賜之貧者不能輸錢往往但得勅牒而無告身五代之亂因以爲常官卑者無復給告身中書但錄其制辭編爲勅甲岳建言以爲制辭或任其材能或褒其功行或申以訓誡而受官者既不給告身皆不知受命之所以然非王言所以告詔也請一切賜之由是百官皆賜告身自岳始也

崔稅傳稅爲翰林學士晉高祖時以戶部侍郎爲學士承旨權知天福二年貢舉初稅爲學士嘗草制爲宰相桑維翰所改稅以唐故事學士草制有所改者當罷職乃引經據爭之維翰頗不樂而稅少專於文學不能洩事維翰乃命稅知貢舉稅果不能舉職時有進士孔英者素有醜行爲當時所惡稅旣受命往見維翰維翰素貴嚴尊而語簡謂稅曰孔英來矣稅不諭其意以謂維翰以孔英爲言乃考英及第物議大以爲非卽罷學士

九國志南唐韓熙載爲和州司馬久之召爲中書舍人乃始親制誥典雅有元和之風

十國春秋吳太祖世家天復二年冬十月李儼至揚州吳王始建制勅院每有封拜輒以告儼於紫極宮元宗像前陳制書再拜然後下

後蜀李昊傳昊自言唐相紳之後後主與江南通好遣使者趙季札往聘購得李紳武宗朝入相制

書還以遺吳昊結綵樓置其中盡召成都聲伎昊朝服前迎歸第大會賓客宴飲所費不貲以帛二千匹謝季札

宋史李穆傳穆拜左拾遺知制誥五代以還詞令尙華靡至穆而獨用雅正悉矯其弊

梁周翰傳乾德中獻擬制二十編擢爲右拾遺

錢氏世家忠獻王佐長子昱獻太平興國錄求換臺省官令學士院召試制誥三篇改祕書監判尙書都省

韓丕傳丕字太簡爲職方員外郎知制誥雍熙初加虞部郎中二年與賈黃中徐鉉同知貢舉丕屬思艱澀及典書命傷於稽緩宰相宋琪性褊急常加督責或申以諧謔丕不能平又舍人王祐以前輩負氣每陵轢面折之丕乃表求外郡出知虢州

王旦傳旦拜右正言知制誥初父祐以宿名久掌書命旦不十年繼其任時論美之

劉筠傳筠字子儀大名人知制誥加史館修撰出知鄧州徙陳州還糾察在京刑獄知貢舉遷尙書兵部員外郎復請鄧州未行進翰林學士初筠嘗草丁謂與李迪罷相制旣而謂復留令別草制筠

不奉詔乃更召宴殊筵自院出遇殊樞密院南門殊側面而過不敢揖蓋內有所愧也

陳從易傳從易知制誥初景德後文士以雕靡相尙一時學者鄉之而從易獨守不變與楊大雅相厚善皆好古篤行時朝廷矯文章之弊故並進二人以風天下兼史館修撰

丁謂傳仁宗卽位進司徒兼侍郎爲山陵使寇準李迪再貶謂取制草改曰當醜徒千紀之際屬先皇違豫之初罹此震驚遂至沈劇凡與準善者盡逐之

王堯臣傳堯臣以文學進典內外制年餘其爲文詞溫麗

楊察傳察字隱甫幼孤七歲始能言母贖知書嘗自教之敏於屬文其爲制誥初若不用意及藁成皆雅緻有體當世稱之

張瓌傳瓌知制誥草故相劉沆贈官制頗言附會取顯位沆子瑾帥子弟婦女衰絰詣闕哭訴瓌挾私怨且醜詆其人執政以褒贈乃恩典瓌不當爲貶詞出知黃州然瑾亦竟不敢請父諡

劉瑾傳瑾字元忠吉州人沆之子也第進士爲館閣校勘沆亡得褒贈知制誥張瓌草詞語涉譏貶瑾泣涕不能食閤門衰絰邀宰相自言朝廷爲改書命黜瓌爲州瑾亦坐衰服入公門罷職沒喪不

就官丐守墳墓王素爲請以伸孝子之志詔復職

王巖叟傳巖叟爲文語省理該深得制誥體

董敦逸傳元祐六年敦逸召爲監察御史同御史黃慶基言蘇軾昔爲中書舍人制誥中指斥先帝事其弟轍相爲表裏以紊朝政宰相呂大防奏曰敦逸慶基言軾所撰制詞以爲謗毀先帝臣竊觀先帝聖意本欲富國強兵鞭撻不庭一時羣臣將順太過故事或失當及太皇太后與皇帝臨御因民所欲隨時揀改益事理當然爾昔漢武帝好用兵重斂傷民昭帝嗣位博採衆議多行寢罷明帝尙察屢興慘獄章帝改之以寬厚天下悅服未有以爲謗毀先帝者也至如本朝真宗卽位弛放逋欠以厚民財仁宗卽位罷修宮觀以息民力凡此皆因時施宜以補助先朝闕政亦未聞當時士大夫有以爲謗毀先帝者也比惟元祐以來言事官用此以中傷士人兼欲動搖朝廷意極不善轍復奏曰臣昨日取兄軾所撰呂惠卿告觀之其言及先帝者有曰始以帝堯之仁姑試伯鯨終然孔子之聖不信宰予兄軾亦豈是謗毀先帝者邪臣聞先帝末年亦自深悔已行之事但未暇改爾元祐改更蓋追述先帝美意而已宣仁后曰先帝追悔往事至於泣下大防曰先帝一時過舉非其本意

宣仁后曰皇帝宜深知於是敦逸慶基並罷

鄧潤甫傳潤甫知成都府召復翰林學士兼掌皇子閣牋記一時制作獨倚潤甫焉哲宗立惟潤甫在院一夕草制二十有二進承旨修撰神宗實錄以母喪去終制爲吏部尙書梁燾論其草蔡確制妄稱有定策功乃以龍圖閣學士知亳州

林希傳希紹聖初進寶文閣直學士知成都府道闕下會哲宗親政章惇用事嘗曰元祐初司馬光作相用蘇軾掌制所以能鼓動四方安得斯人而用之或曰希可惇欲使希典書命逞毒於元祐諸臣且許以爲執政希亦以久不得志將甘心焉遂留行復爲中書舍人修神宗實錄兼侍讀哲宗問神宗殿曰宣光前代有此名乎希對曰此石勒殿名也乃更爲顯承時方推明紹述盡黜元祐羣臣希皆密豫其議自司馬光呂公著大防劉摯蘇軾轍等數十人之制皆希爲之詞極其醜詆至以老姦擅國之語陰斥宣仁讀者無不憤歎一日希草制罷擲筆於地曰壞了名節矣遷禮部吏部尙書翰林學士擢同知樞密院始惇疑曾布在樞府間已使希爲貳以相伺察希日爲布所誘且怨惇不引爲執政遂叛惇會邢恕論希罪惇因并去之罷知亳州移杭州布不能救也旋以端明殿學士知

太原府徽宗立徙大名上河東邊計三策朝廷以其詞命醜正之罪奪職知揚州

韓駒傳宣和六年遷中書舍人兼修國史入謝上曰近年爲制誥者所褒必溢美所貶必溢惡豈王言之體且盤詰具在盜若是乎駒對若止作制誥則粗知文墨者皆可爲先帝置兩省豈止使行文書而已上曰給事實掌封駁駒奏舍人亦許繳還詞頭上曰自今朝廷事有可論者一切繳來尋兼權直學士院制詞簡重爲時所推

張閣傳閣字臺卿爲翰林學士嘗夜盛寒草制藁進帝猶坐賞其警敏賜詩以爲寵京免相閣當制歷數其過詞語適拔人士多傳誦之

劉一止傳一止字行簡歷數文閣待制致仕博學無不通爲文不事纖刻制誥坦明有體書詔一日數十輒辦嘗言訓誥者賞善罰惡詞也豈過情溢美怒鄰罵坐之爲哉其草顏魯公孫特命官制甚偉帝歎賞爲手書之

趙鼎傳鼎爲文渾然天成凡高宗處分軍國機事多其視草

蔡崇禮傳崇禮字叔厚高密人爲起居郎攝給事中召試政事堂爲制誥三篇不淹晷而就辭翰奇